

PLOANIES DA SAN MARTIN Y LUNGIARÜ

Dai 18 de ma 2020 inant - aladô dles disposiziuns dla diozeja - pôl indô gnî dit mësses y tignî funziuns te dlijia cun la partezipaziun dla comunité. Por garantî la mascima segurêza por che le corona virus ne se desleries nia fora, él sambegn da se tignî a na ligna de regoles de comportamënt, ch'i orun respeté por nosc bëgn y por chël di atri:

- i jun te dlijia un al iade, se dejinfetun les mans y tignun na destanza de 1,5 m un dal ater; le nes y la bocia é coris da na mascherina ch'i tignun vistida tratan dōta la mëssa/funziun;
- tles proches él scrit dant n meter de destanza da òna na porsona al'atra, porchël se sentunse ti posc amarsciâ; porsones de na medema familia pó se senté adòm y fá plëna la proca;
- da jí ala Comuniun tignunse na destanza de 1,5 m dal'atra porsona;
- ince da jí fora de dlijia stunse 1,5 m dalunc dai atri y i ne stun nia te grups sön plaza dan dlijia;
- porsones che á na temperaturâ dl corp plü alta co 37,5° o che á albü contat cun porsones infetades ne pó nia jí te dlijia.

Tla dlijia da San Martin ál lerch 67 porsones, te chëra da Lungiarü 56; les mësses pó gnî acompagnades dal sonn dl orghe y da n cantor, mo nia dal cor de dlijia; i libri tles proches é gnüs tuc demez y le boché dal'ega santa resta ôt; do vigni mëssa o funziun vëgn la dlijia dejinfetada y al vëgn lascé ite aria frësca. La dlijia resta daverta ia por le de por l'oraziun personala de vignöna y vignun. Les mësses y funziuns pó inant gnî ascutades tl radio dla cōra da dūc chi che ne sciafia nia da jí te dlijia o che ne s'la sint nia.

Tles proscimes plates gnarâl dé informaziuns plü avisa, do che le Consëi de Cōra s'ará abiné.

I sun dōtes y dūc bel períá da nes tignî al regolamënt y da fá le miú adinfora, por che les mësses y les funziuns de dlijia pois gnî zeledades cun dignité. Dilan! - *Le Consëi de Cōra cun siur Klaus y siur Heinrich*

PLOANIA DA SAN MARTIN

En dedemesaledema, ai 20 de ma, dales 17.00 inant, vëgnel indô sié la cortina; chi che sciafia é dër bel invíá da gnî a daidé. Da bur tēmp vëgnera siada la jōbia.

A Dietenheim él mort ai 12.05.2020 Albert Zingerle, nasciü a San Martin ai 22.08.1944, che é sté 5 agn comandant di stōdafūch da San Martin. I s'al recordun tla oraziun: La vita eterna dá, Signur y confortele cun to lominus. Al palse tla pesc!

Ciasa de Palsa: I rengraziun dūc chi che ti á mené posta tratan chëstes edemes ai berbesc y ales mëdes che vir tla Ciasa de Palsa. La posta é gnūda dër aprijada. Prëibel scriedi inant.

Les portes dla Ciasa de Palsa resta inant stlūtes por vijitadus, mo an pó tó sō contat cun i berbesc y les mëdes tres internet. Implü gnarâl metü a jí tl dagní na poscibilité da s'incunté te n ambiënt sigü por i berbesc y les mëdes.



Plata dles Ploanies San Martin y Lungiarü

siur ploan Klaus Sottsas 344 15 54 055 - klsottsas@yahoo.de

siur curat Heinrich Perathoner 339 65 74 213

redaziun: anton.gasser@rolmail.net - 348 27 44 517 / 0474 523 194

www.valbadiaonline.it/comunita



17.05. – 24.05.20 nr. 25

6ª DOMÈNIA DE PASCA - A

Vangele do Jan 14,15-21

Sc'i m'orëis bun, se tignarëise a mi comandamënc, y iö periarà le Pere, y ël ves darà n'ater paraclet, che dess restè pro os por dagnora.

Al é le Spirit dla verité, che le monn ne po nia ciafè, deache ël ne le vëiga nia y ne le conësc nia.

Os indere le conescëis, ciodich'al sta pro os y sarà te os.

I ne ves lasciarà nia indô sciöche òrfanns, mo i vëgni indô da os.

Ma ciamò pūch tēmp,

y le monn ne me vëiga nia plü;

mo os m'odëis,

deach'i viri y incé os viarëis.

En chël dé conesciarëise:

Iö sun te mi Pere,

os sëis te mè, y iö sun te os.



Gejú nes dá le Spirit Sant, sc'i ti orun bun a Idí y se tignun a sū comandamënc.

Ti orëi bun a Idí ó dí: baié cun ël y le laldé, le rengrazié y le perié en comunité.

Se tigní ai comandamënc ó dí: ti orëi bun ince ai atri y a se instësc.

I m'ó bun sc'i m'azeti y me soporti, sc'i sun contënt cun ci ch'i sun y ci ch'i á.

Insciö sunsi ince bun da ti consintí val' ai atri y da m'alegré impara, y da ti orëi bun al proscim y a Chël Bel Dî.

Te chi che é bugn da orëi bun él le Spirit Sant che pó operé, daidé y dé sostëgn.

Le Spirit Sant nes fej conësc la verité de Gejú: "Os sëis te me y iö sun te os" Vignun á sūa lerch tl cōr de Gejú, a vignun él Gejú che ti ó bun.

Savon chësc junse zënza pora y plëgns de ligrëza fora por la vita.

"Iö sun te os." Sc'i sun cosciënc ch'i incuntun te vigni porsona Gejú, spo ciarunse da ne ti fá nia de mal, da la incunté cun respet y simpatia.

I ne sun nia bugn da sciazé assá tan tröp che na porsona implida de Spirit Sant pó ester de pesc y de benedisciun por se instëssa y por le monn.

TÈMP DE PASCA		SAN MARTIN Y LUNGIARÛ	
17.05.20 6ª DOMÈNIA DE PASCA - A <i>Dales 12.00 vëgnel soné adöm les ciampanes te dōta la diozeja por la ligrëza che les dlïjies pó indô gnides daurides ala comunité</i>	10.00 Gran Mëssa por la Comunité a San Martin mëssa por defunc da San Martin: da Lungiarü: + Helmut Dejaco (dl ann) + Iaco Mischi, Majuns (dl ann) + + Carlo y Hannele Zingerle (dl ann) + Albino Clara, Brocia (dl ann) + siur Fonjo Clara + Roslinda Clara 19.00 Devoziun/Corona de ma <i>da aldí tl radio dla cōra da San Martin</i>		
18.05.20 Lönesc Jan, Felix, Erich	19.00 Devoziun/Corona de ma <i>da aldí tl radio dla cōra da San Martin</i>		
19.05.20 Dedolönesc <i>Ivo, Zelestin</i>	19.00 Devoziun/Corona de ma 19.30 Mëssa dl ann + Paul Vantsch, Tascia + Alfred Videsott + + + Sepl, Sabine y Milio Flöss		
20.05.20 Mercui Bernardin, Elfriede, Valeria	19.00 Devoziun/Corona de ma	7.30 Mëssa + + Paul y Maria Castlunger, Ties + Iaco Mischi	
21.05.20 Jöbia dles Crusc <i>Hermann Josef</i>	7.30 Mëssa + Clara Sorá (dla Uniun) vis y def. fam. Conti y Monti + + fam. Gutto Corona por vocaziuns 19.00 Devoziun/Corona de ma		
22.05.20 Vëndres dles Crusc Rita da Cascia	18.30 Adoraziun chîta 19.00 Adoraziun deboriada	7.30 Mëssa + Lidvina Costa, Peca + Vinzenz Clara, Postin	
23.05.20 Sabeda dles Crusc <i>Berto, Desider</i>	18.00 Corona de ma 18.30 Mëssa prefestia en onur de Santa Rita da Cascia + siur Heinrich Videsott + Perpetua Valentini Rubatscher	20.00 Mëssa prefestia fam. Albino Schanung + Pire Clara, Paur	
24.05.20 FESTA DL'ASSËNZA - A ASCENSIUN DL SIGNUR	9.30 Gran Mëssa por la Comunité dl ann + Maria Agreiter Chizzali dl ann + Sciandro Trebo + Pire Sorà (dl ann) + Sergio Menegot 19.00 Devoziun/Corona de ma	7.55 Corona 8.15 Gran Mëssa por la Comunité + + siur Fonjo y suor Floriana Clara	

I n'orun nia s'la odëi
y sté a conscidré ch'i gnun tres demanco
y ch'i ne sun nia bugn da se trá la jënt.
Ci nes dij pa la pröma lëtra de San Pire?
Stede dagnora arjignà
da ti respogne a vignun che damana
do la speranza che ves implësc!



Dî dla vita, sot al pëis dl Corona Virus
te periunse por chi che s'á amaré y stënta
da se romëte y por düc chi che é morc,
düc chi che laora ti ospedai, tles strotöres
de assistënza y de aiüt, por chi che governëia
y á da tó dezijiuns por le dagní.
Sostëgn chi che é rová te de gran dificultés
economiches, che á pordü le post de laur y
la fontana de davagn.
Recordete dles families y di geniturs che
á da istrú y da ciaré di mituns a ciasa.
Dëidesse cun to amur y to aiüt da superé
chësta crisa y no lascé sozede che la coia
se desleries indô fora danü. Móstresse tû trus
da pié indô ia y deuresse le cör un por l'ater
ch'i portunse pro ala costruziun de to rëgn
d'amur y de pesc. Amen.